

DOMENIE IX «VIE PAL AN»

Antifone di jentrade cf. Sal 24,16-18

Voltiti de mê bande, Signôr, e ve misericordie,
parcè che o soi bandonât e puar.
Cjale il gno aviliment e la mê pene,
bute lontan di te ducj i miei pecjâts.

Colete

Diu, che la tô providence no fale in ce che e à destinât,
ti preìn a schene plete
che tu slontanis di nô dut ce che al pues fânus mâl
e tu nus dedis dut ce che nus confâs.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Dt 5,12-15

Tu ti visarâs che ancje tu tu âs vût stât sotan te tiere dal Egjit.

Dal libri dal Deuteronomi

Cussì al dîs il Signôr: «Rispiete la di de sabide par santificâle, come che ti à comandât il Signôr to Diu. Par sîs dîs tu lavorarâs e tu fasarâs lis tôs voris, ma la setime zornade e je une sabide pal Signôr to Diu. No tu fasarâs nissune vore, ni tu, ni to fi, ni tô fie, ni il to famei, ni la tô sierve, ni il to bo, ni il to mus, ni nissune des tôs bestiis, ni il forest che al è tes tôs puartis. E cussì, compagn di te, a podaran polsâ ancje il to famei e la tô sierve. Tu ti visarâs che tu âs vût stât sotan te tiere dal Egjit e che il Signôr to Diu ti à fat saltâ fûr cun man fuerte e cun braç tindût; al è par chel che il Signôr to Diu ti à ordenât di rispietâ la di de sabide».

Peraule di Diu.

SALM RESPONSORIÂL dal Salm 80

R. Gjoldìn in Diu, che nus à liberâts.

Dait sù il salm e sunait il timpli,
la citare gjoldibil insiemi cu l'arpe.
Sunait la trombe te di de lune gnove,
tal colm de lune, te di de nestre fieste. **R.**

Cheste e je une leç par Israel,
un ordin dal Diu di Jacop;
jal à dât a Josef come testemoneance,
cuant che de tiere dal Egjit al è saltâ fûr. **R.**

O sint un lengaç mai cognossût:
«Tu âs berlât viers di me te disperazion
e ti à liberât. **R.**

No tu varâs framieç di te nissun altri diu,
denant di dius forescj no tu varâs di inzenoglâti.
Jo o soi il Signôr, il to Diu,
che de tiere dal Egjit ti à fat saltâ fûr». **R.**

SECONDE LETURE 2 Cor 4,6-11

La vite di Jesù si palese te nestre cjar.

De seconde letare di san Pauli apuestul ai Corints

Fradis, Diu che al à dit: “La lûs che e lusi fûr dal scûr”, al à lusît tai nestrîs cûrs, par fâ sflandorâ la cognossince de glorie di Diu su la muse di Crist.

Ma chest tesaur lu vin in vâs di arzile, par che si viodi che cheste fuarce straordenarie e ven di Diu e no di nô. O sin tribulâts di ogni bande, ma no sfracaiâts; malsigûrs ma no disperâts; parâts vie ma no bandonâts; butâts par tiere ma no copâts; puartant simpri e pardut la muart di Jesù tal nestri cuarp, par che tal nestri cuarp si palesi ancje la vite di Jesù. Di fat nô che o sin vîfs o sin esponûts di un continuî a la muart par vie di Jesù, par che ancje la vite di Jesù si palesi te nestre cjar mortâl. Peraule di Diu.

CJANT AL VANZELI 2 Cor 3,6.17

R. Aleluia, aleluia.

La letare e cope, il Spirt al fâs vivi,
e là che al è il Spirt dal Signôr e je la libertât.

R. Aleluia.

VANZELI Mc 2,23-3,6*

Il Fi dal om al è paron ancje de sabide.

Dal vanzeli seont Marc

Al capitâ che intant che Jesù, di sabide, al passave pai cjamps semenâts, i siei dissepui, par strade, si meterin a cjapâ sù i spîs. Alore i fariseus i diserin: «Cjale! Parcè fasino ce che nol è permetût di sabide?». Ur rispuindê: «No vêso mai let ce che al à fat David, cuant che si è cjatât te dibisugne e a vevin fan tant lui che i siei compagns? Cemût che al è jentrât te cjase di Diu, sot dal sorestant dai predîs Abiatar, e al à mangjât i pans benedîts, che a puedin mangjâju dome i predîs, e ur ind à dâts ancje ai siei compagns?». E ur diseve: «La sabide e je fate pal om e no l'om pe sabide. Pa la cuâl il Fi dal om al è paron ancje de sabide».

Al jentrà un'altre volte te sinagoghe, là che al jere un om che al veve une man paralizade, e lôr lu tignivin di voli par viodi se al varès vuarît di sabide, cul fin di podê incolpâlu. I dîs al om che al veve la man paralizade: «Jeve sù e ven chi tal mieç!». Alore ur dîs: «Isal permetût di sabide fâ ben o fâ mâl? Salvâ une vite o sassinâle?». Ma lôr a tasevin. Alore, cjalantju cun rabie e avilît pe tristerie dal lôr cûr, i disè al om: «Slungje la man!». E chel le slungjà e la sô man e tornà sane. Ma i fariseus, a pene jessûts di li, a faserin consei cui erodians cuintri di lui, par studiâ il mût di fâlu fûr.

Peraule dal Signôr.

Forme curte: Mc 2,23-28

Dal vanzeli seont Marc

Al capitâ che intant che Jesù, di sabide, al passave pai cjamps semenâts, i siei dissepui, par strade, si meterin a cjapâ sù i spîs. Alore i fariseus i diserin: «Cjale! Parcè fasino ce che nol è permetût di sabide?». Ur rispuindê: «No vêso mai let ce che al à fat David, cuant che si è cjatât te dibisugne e a vevin fan tant lui che i siei compagns? Cemût che al è jentrât te cjase di Diu, sot dal sorestant dai predîs Abiatar, e al à mangjât i pans benedîts, che a puedin mangjâju dome i predîs, e ur ind à dâts ancje ai siei compagns?». E ur diseve: «La sabide e je fate pal om e no l'om pe sabide. Pa la cuâl il Fi dal om al è paron ancje de sabide».

Peraule dal Signôr.

Su lis ufiertis

Confidant tal to boncûr, Signôr,
o vignìn al to altâr sant cui nestrîs regâi
par che, purificâts de tô gracie,
o podìn jessi smondeâts cui misteris che o celebrìn come tiei servidôrs.
Par Crist nestri Signôr.

Antifone a la comunion Sal 16,6

Jo ti clami, Diu gno, ma tu rispuindimi.
O soi sigûr che viers di me tu slungjis lis tôs orelis:
scolte ce che ti dîs.

O ben: Mc 11,23.24

Us al dîs in veretât: dut ce che o domandais te preiere,
crodêt di vêlu za vût e us sarà dât, al dîs il Signôr.

Daspò de comunion

Daspò di vênus nudrîts cul Cuarp e cul Sanc di to Fi,
tegninus sù cul to Spirt, Signôr,
par che ti testimoneîn no dome cu la peraule e la lenghe,
ma ancje cu lis oparis e la veretât
e cussì o podìn jentrâ intal ream dai cîi.
Par Crist nestri Signôr.